

**Ako se ikad jopet zajubin**

## Ako se ikad jopet zajubin

Ako se ikad jopet zajubin, neka to ne bude u jesen.

U jesen guši južina,  
manta lebićada,  
u kosti se uvlači vлага,  
obliju kiše i povodanji,  
čupadu vitri  
dok nebo plae.

Ako se ikad jopet zajubin, nadan se da to neće bit u jesen  
kad tice bižidu prema jugu,  
lumbrele su nan u ruci po cile dneve,  
priskačemo duboki kal i šporke kaške,  
išćemo sunce  
i suvu šentadu u đardinu.

I zato,  
ako se ikad zajubin, neka to nikako ne bude u jesen  
kad je vrime promjenjivo

...

da takova ne bude i jubav...

(2010.)

**jopet** opet

**kolura** boja

**mantat** imati vrtoglavicu

**lebićada** vrsta vjetra

**povodanj** jaka, obilna kiša

**bižat** bježati

**lumbrela** kišobran

**kal** kaljuža

**šporke** prljave

**kaška** kal, blato

**šentada** klupa

**dardin** park

**jubav** ljubav

## Kad si zajubjen

Kad si zajubjen,  
ka da si gluv – ne čuješ;  
a i da čuješ, ne bi obada  
jerbo u tujin ričiman vidiš puku đeloziju, privaru i laž.

Kad si zajubjen,  
ka da si ujedanput oćoravija i ne vidiš prst prid noson;  
ne mo'š govorit, ne mo'š ni plakat, ni kantat.

Ka da te čapala gripa, svaka te žunta boli;  
ne mo'š ist, ni pit,  
spavat, ni radit,  
a srce buba, pa priskoči,  
pa jopet buba.

Zapitaš se triba li se cijepit kontra jubavi  
joli joj se boje dat ka fibri koja te pase,  
a ti pustiš tilo da se samo bori.

Ako je vridno jubit i bit jubjen,  
izborit će se,  
(pri)živit će...

(2016.)

**gluv** gluh  
**obadat** mariti  
**tugi** tudi  
**đelozija** ljubomora  
**oćoravit** oslijepiti

**mo'š** možeš  
**kantat** pjevati  
**čapat** uhvatiti  
**žunta** dio (tijela)  
**ist** jest

**bubat** tući  
**kontra** protiv  
**fibra** temperatura  
**past** jesti  
**tilo** tijelo

## **Di je sad moji' osamnaest?**

Pari mi se da san još jučer jemala osamnaest;  
kokolavala me mladost, prijateji me radovali, nadala se jubavi.

Vrime pasavalو,  
planovi mi se zamrsili meju oblaciman,  
pogubili se u maglan dišperacije  
i u nesanin, linin zoran,  
nade mi odletile s 'tican, prijateji za ženan,  
a ja san sama nastavila visinan.

Bilo je ka jučer, jemala san osamnaest,  
trošila vrime virujući da ga jeman obilato.  
I trkala san, gubila ariju, padala  
i jopet trkala u straju od dosade i ništavila,  
sadašnjost mi bila važnija od prošlosti i budućnosti,  
istina od autoriteta, iskrenost od korišti, davanje od primanja.  
Moja šarmantna ludost rastopila se u idealizmu.

I?

Izgubila san se.  
Još jučer mi se parilo da jeman osamnaest,  
a danas san gritavica sumnjičavog pogleda, škrti riči.

Ka da su svi bili nikako razumniji od mene.

Di je sad moji' osamnaest?

(2015.)

**kokolovat**igrati, maziti  
**pari se** čini se  
**pasavat** prolaziti  
**dišperacija** razočaranje  
**lini** lijeni  
**obilato** napretek, puno  
**arija** zrak

**jopet** opet, ponovno  
**jeman** imam  
**'tica** ptica  
**trkat** trčati  
**straj** strah  
**grintavica** ljuta žena, nestrpljiva,  
nervozna

## Pričaj mi

Pričaj noćas čagod lipega,  
neka mi srce zabala ka prvi put kad si me osvojija.

Nemoj jopet počet kako je život nepošten  
i da ne znaš oćeš li moć nastaviti san brez mene.

Ne plaši se te noći  
jerbo je nebo puno zvizd!  
Sićaš se one dvi prema Zapadu?  
Bit ćemo oboje visoko gori.

Ajde, pričaj mi o moriman kojima si navigava,  
o neveran ča smo pribrodili, nevoje i sriće ča smo pasali  
ma vavik smo skupa ostali;  
zakantaj mi čagod noćas, onu našu,  
ja ću te pratiti sottovoce škorcanin i ruvinanin glason –  
nikako večeras niman force.

Otvori, molin te, širon škure neka ulize misečina,  
pomozi mi do ponistre:  
želin gledat more i jidra u vali kako drćedu  
dok lovidu noćnu bavu.

Pričaj mi, 'ajde pričaj mi, čagod lipega,  
volin te slušat i čutit tvoju ruku u svojoj  
dok ne partin zanavik  
(možda već sutra...)

(2016.)

**čagod** nešto  
**zabalat** zaplesati  
**brez** bez  
**navigavat** ploviti  
**nevera** nevrijeme  
**nevoja** nevolja  
**pasavat** prolaziti  
**vavik** uvijek  
**zakantat** zapjevati  
**sottovoce** potiho, ispod glasa  
**škorcani** puknuti  
**ruvinan** narušen

**jerbo** jer  
**niman** nemam  
**forca** snaga  
**škure** vanjski dio prozora  
**ulizat** ulaziti  
**ponistra** prozor  
**jidra** jedra  
**vala** uvala  
**drčat** drhtati  
**bava** lagani vjetar  
**zanavik** zauvijek

## Ni teško bit pisnik u Zagrebu

Ni teško napisat pismu u Zagrebu  
u jesenje večeri kad šuška lišće pod nogan,  
adrvoredi se obučedu u zelenožutecrvene kolure;  
ni teško uzet kartu i lapiš i napisat stih  
ni usrid primalića dok puca top s Griča i plaši gladne golube,  
lako najdeš prave beside u plavin tramvajiman,  
kod kumic na Docu  
joli kad si opijen cvičen na Zrinjevcu.

I o Dalmatinciman u Zagrebu lako napišeš pismu –  
najdeš ih u điradi suboton na Trgu, *Slobodna* in pod rukon,  
pari se ka da grlidu Dalmaciju.

Lako Zagreb zamanta: vodoskociman, crkvani i muzejiman,  
plemićkin grboviman na starin fasadan,  
gospodon ča elegancijon paridu Bečani.

Stvarno, meni ni bilo teško pisat pisme u Zagrebu  
dok san bija izgubjeni brucoš,  
ubija vrime u Matoševon društvu  
brojeći zagrebačke kampane.

Danas u sićanje prizivan vrime naše jubavne sumaglice,  
stajanje ispod *Konja* kad smo grijali dlanove na škartocu  
s teplin maruniman.

U Zagrebu i danas živedu poete,  
ma ja ti nisan više od pisme ni od voje,  
ne balan s oblaciman dok me češja sjeverac sa Sljemena.  
Fali mi tvoja ruka na mojoj dok tribin pečene marune.  
Danas mi je teško napisat pismu i u Zagrebu.

(2016.)

<b>kolura</b> boja	<b>zamantat</b> izgubiti svijest
<b>karta</b> papir	<b>škartoc</b> papirnata vrećica
<b>lapiš</b> olovka	<b>teplo</b> toplo
<b>primaliće</b> proljeće	<b>maruni</b> kesteni
<b>besida</b> besjeda, riječ	<b>voja</b> volja
<b>joli</b> ili	<b>balat</b> plesati
<b>dirada</b> šetnja (u krug)	<b>češyat</b> češljati
<b>pari se</b> čini se	<b>tribit</b> čistiti koru

## **Ko tebe ni volija?**

Govoridu mi da me nikad nisi volila jer da jesi,  
vidili bi nas judi koji put priko rive, zagrijene i zajubjene,  
i kontrali bi te s menon u điradi na marjanskoj Prvoj vidilici.

Nikakovi trag u mome životu nisi ostavila  
(ka da si se za to posebno trudila):  
nisi mi izronila morsku zvizdu  
ni donila suvenir s putovanja,  
atroke poslala kartolinu.

A ja san naivno sanja našu plažu i naš stol  
u nikon našen kafiću,  
mašta san da trčimo priko Bačvic,  
da sotto brazzo projdemo rivon za Sudamju,  
da provedemo koji vikend u Bolu.

I zašto sad, posli toliko vrimena, želiš znat  
kome san posvetija svoj libar poezije?

Pitaš me jesan li još zamantan Nerudon  
i jema li to veze s tebon?

Ne!

Ti si bila inspiracija u mojin pisman i u akvareliman.

Ko tebe ni volija i ko te je ostavija  
pa si se, posli toliko vrimena, na me raznježila?

(2000.)

www.element.hr

**judi** ljudi  
**dirada** šetnja (u krug)  
**atroke** kamoli  
**kartolina** razglednica

**sotto brazzo** ispod ruke, pod ruku  
**Sudamja** blagdan Sv. Duje  
**zamantat** izgubiti svijest  
**libar** knjiga